

Siunissami pisariaqartitsinerup qulakkeerneqarnissaa siunertaralugu Ilisimatusarfimmi ilinniarteqarfiup illutaatalu annertusineqarneranni aningaasaqarnikkut allaffissornikkullu kingunerisassat misissorneqarnerannik imaqartumik nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaammut atatillugu sukumiisumik misissorneqassaaq, danskit nunanilu allani aningaasaateqarfiit assigisaallu aningaasalersorneranut akuutinneqarsinnaanersut. Nassuiaat Inatsisartunut agguanneqassaaq 1. januar 2027 nallertinnagu.

(Inatsisartunut ilaasortaq, Jørgen Rosbach, Demokraatit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Siunnersuut pillugu Naalakkersuisut sinnerlugit qujassuteqassaanga. Naalakkersuisut isumaqatigaat tassa ilinniarneq aqqutigalugu, suliffissanik piginnaaneqarfiusartunik pilersitsisarpugut, tamat oqartussaanerat annertusarlugu, naligiinnerulersitsilluta nunamilu tamarmi ineriartorneq tamaat tapersersortarlugu.

Ilisimatusarfimmi inissaaleqineq nukinginnartumiippoq. Ilimmarfik 2008-mi ilinniagaqartunut 130-nut ilinniartitsisunullu 20-nut naatsorsuussamik sananeqarpoq, ullumikkullu iliniagaqartut 615-upput ilinniartitsisut 112-ullutik. Ukiuni 20-ni tulluuttuni 20%-mik qaffannissaa naatsorsuutigineqarmat ilinniagaqartut 900-uusapput ilinniartitsisullu 180-iussallutik. Ullumikkut inissaaleqineq pissutigalugu ininik illoqarfimmi attartuisoqartarpoq, Ilinniarfissuullu illuutai pisoqqat qimanneqartariaqarsimapput suliffimmi avatangiisitigut ajornartorsiutit pissutigalugit, ullumikkut iliniartitsisunngorniarfik iliniartitsivinnik innissaateqanngilaq.

Suliniut UPPIK, Ilimmarfiup illuutaasa allineqarnissaanut suliniutaavoq, naatsorsuutigineqarporlu ukiut arlallit qaangiutereerpata aatsaat allisaaneq piareerneqarumaartoq. Ukioq 2026 naaneranut nassuiaasiornissamut suli sanaartornermi pissutsit arlallit erseqqissarneqartariaqarput. Taamaammat paasissutissat katersorneqareersimasut, ilisimasallu saqqummiunneqarsimasut kiisalu nassuiaatip naammassineqarnissaanut ilisimasassatut pilersaarutigineqartut katersorneqarsimasut nassuiaatip naammassineqarsimasup imarissavai.

Naalakkersuisut siunnersuut taperserpaat nassuiaasiortoqarnissaanillu paasissutissat katersorneqareersimasut, ilisimasallu saqqummiunneqarsimasut kiisalu nassuiaatip naammassineqarnissaanut ilisimasassatut pilersaarutigineqartut katersorneqarsimasut imaritillugit sulissutigineqarnissaa kissaatigaat. Nassuiaat 1. januar 2027 nallertinnagu Inatsisartunut agguanneqassaaq.